

四庫全書

集部

欽定四庫全書

宋元詩會卷六十五

兵部主事陳焯編

金詩附

張介

字介夫彭城人正大元年經義第一人  
歷鞏穀孰二縣令幼有賦聲為人蘊藉

讀天寶遺書

不但昨非今亦非上皇騎馬淚沾衣曲江死後無忠諫

卻憶詞人秋雁飛

龐漢

字茂弘平晉人正大末年進士沈毅  
有志節待次內鄉北山兵亂遇害

終南谿

冷雲低壓萬長楊十頃秋陰鎖北堂門外兵塵漲秦楚  
水邊烟景似湖湘荷翻山雨僧窗晚竹汎溪風客枕涼  
早晚初平遂真隱遶陂閒牧石頭羊

神童劉微

字伯祥益都人七歲能文道陵召入宮賦鳳凰來儀二首稱旨賜經童出身係籍太學後登貞祐二年第

春柳應制得城字

翠鈿圓勻綠線輕著行排立弄新晴更看三月春風裏散作飛花滿鳳城

王世賞

字彥功汴人與尹無忌王逸賓趙文孺相周旋明昌中保舉才能德行賜出身釋褐鞏州教授終于鹿邑簿有浚水老人集傳于世

立春後十日登樓

今日登樓眼風烟倍覺新  
溪梅初破萼屋雪半融銀  
雁外天逾碧鷗邊水自春  
兒曹應見笑吟望獨傷神

春雪

只謂春天暖寧知雪霰飛  
龍蛇且深蟄花柳不勝威  
糝糝凌風細紛紛帶雨稀  
誰當問穹昊生殺果何機

桑之維

字之才思州人蔡丞相伯堅之子壻  
也以樂府著稱有東臬集傳于世

白髮

白髮近年見十中三兩莖半因愁僣出多為病添成梳  
裏有時落鑷餘還又生老知無可避何處是功名

馮文叔

文叔遼東人

客舍

禿襟袖褐破書囊十五年來客異鄉生事甯中搖虎尾  
窮途天上轉羊腸三朝不過馮唐老半夜悲歌甯戚狂

獨倚牛車望遼海西風塵土鬢蒼蒼

宗道

字雲叟山陰人以足疾不仕有詩云家藏千卷富  
身得一生閒茅屋經年補柴門盡日關其自處可  
見

寶巖僧舍

寂寂鐘魚栢滿軒午風輕颺煮茶烟西廊竟日無人到  
只許山人借榻眠

鮮于溥

字彥仁宋文臣子駿之後高祖淳淳之子孝標標  
之子壽吉壽吉之子坦皆擢進士第而仕亦達彥  
仁坦之子以門資仕終于櫟陽令濟源盤谷天壤  
佳處坦父子居其間飲酒賦詩翛然塵垢之外至  
今人以高士目之

### 魯村道中

小橋沙路已堪圖更著衰翁跨蹇驢  
暮靄似催寒日短秋容仍帶遠林疎  
鵬盤平野黃榆落兔走橫岡白草枯  
漸喜閒身遠朝市一年強半在村墟

### 早發



燈前夢斷家千里馬上詩成月一痕  
晨粥未烹官路遠  
隔林烟火是漁村

郝天挺

字晉卿陵川人家世儒素伯父子颺有詩名號東軒老人晉卿少日有賦聲早衰多疾厭于名場遂不復就舉貞祐之兵避于河南往來淇衛間為人有崖岸耿耿自信寧落薄而死終不一傍富兒之門年五十七卒于舞陽臨終浩歌自得不以死生為意其平日自處為可見矣元好問少從晉卿學舉業晉卿教之曰今賦學以速售為功六經百氏分磔綴緝外或篇題句讀之不知幸而得之不免為庸人況一敗塗地者乎又曰讀書不為藝文選官不為利養唯通人能之又曰今世仕宦多用貪

墨敗官皆苦于饑凍弗克自堅者耳男子生世不耐饑寒則雖小事不能成子試以吾言求之其所持論如此子思溫字和之  
孫經字伯常入元為名臣

送門生赴省闈

青出於藍青愈青  
小年場屋便馳聲  
未饒徐淑早求舉  
卻笑陸機遲得名  
嗟我早衰空眊眊  
喜君初筮已崢嶸  
此行占取鰲頭穩  
平地烟霄屬後生

徐好問

字裕之永寧人彭汝實曰徐與遺山同名同字不以為嫌而錄其詩前輩胸中廣大類此

龍門

疎鑿而來道路通行人萬古翠微中南山山寺題詩滿  
一字何嘗到禹功

邢安國

字仲祥沁州武鄉人少日有賦聲四十歲後即不  
應科舉以詩酒自娛避亂客泌陽十餘年後北歸  
備極艱苦往往見於詩云

楊花

細點輕團轉復飄隋家堤岸霸陵橋非綿非絮寒無用

如雪如霜暖不消  
狂惹客衣知有恨  
巧尋禪榻故相撩  
陂塘回首浮萍滿  
依舊春風擺翠條

劉 豫

字彥由阜城人仕宋知濟南府事汴京下立張邦昌為大楚皇帝宋滅楚更立彥由國號齊建元阜昌八年廢為蜀王遷黃龍府改封曹有集十卷行于世

雜詩 三首

風荷柄柄弄清香  
輕薄沙禽落又翔  
紅日轉西漁艇散  
一川山影暮天涼

古渡停驂日向沈淒涼歸思梗清吟碧山幾點塞天濶  
紅葉一林秋意深

寒林烟重暝棲鴉遠寺疎鐘送落霞無限嶺雲遮不斷  
數聲和月到山家

虞仲文

字質夫世南之裔武州寧遠人仕為遼相歸金授  
樞密使平章政事封秦國公四歲作詩賦煎餅有  
魚目蟬聲之句  
人以神童目之

雪花

四歲作

瓊英與玉藥片片落前池問著花來處東君也不知

按元裕之于金相詩內載有張丞相孝純字永錫滕陽人宋宣和末知太原金兵圍城死守踰年人相食幾盡城始下金主憐其忠換以相職詩無足觀故不錄而初志可嘉聊記於此

### 耶律履

字履道東丹王之七世孫學易通太玄至於陰陽歷數無不精究蔭補國史掾興陵朝累遷薊州刺史入翰林為修撰歷直學士待制禮部尚書特賜孟宗獻榜進士第俄預淄王定冊功拜參知政事

明昌元年進右丞薨年六十一興陵嘗問宋名臣孰為優履道以蘇端明軾對上曰吾聞軾與王詵交甚歡至作歌曲戲及姬侍非禮之甚尚何足道耶履道進曰小說傳聞未必可信就使有之戲笑之間亦何得深責世徒知軾之詩文為不可及臣觀其論天下事實經濟良才求之古人陸贄而下未見其比陛下無信小說而忽賢臣之言明日錄軾奏議上之詔國子監刊行自號忘言居士有集傳于世三子辨才武廟署令善才工部尚書楚才中書令四孫鈞鉉鏞鑄

史院從事日感懷

不學知章乞鑑湖不隨老阮醉黃壚試從麟閣諸賢問肯屑蘭臺小史無一戰得侯輸妄尉長身奉粟魏侏儒

禁城鐘定燈花落坐拊虛編惜壯圖

賈益謙

因辨海陵之誣可証金史之謬故於其原傳全錄之

字亨甫本名守謙避哀宗諱改焉宣宗朝參知政事出知濟南移鎮河中南渡後召拜左丞尋致仕居鄭州哀宗即位史官乞因宣廟實錄遂及衛紹王初虎賊既弑逆乃立宣宗宣宗之人至謂衛王失道天命絕之虎實無罪且于主上有推戴之功獨張信甫上章言虎賊大逆不道當用宋文帝誅傅亮徐羨之故事章奏不報爾後舉朝以大安崇慶之事為諱及是謂亨甫大安中嘗拜御史中丞宜知衛王事乃差編修官一人就訪之亨甫知其旨謂來者言知衛王莫如我然我聞海陵被弑而世宗皇帝立大定三十年禁近能暴海陵過惡者得美仕史官修實錄誣其淫毒狠鷙遺臭無窮自



今觀之百可一信耶衛王勤儉慎惜名器較其行  
事中材不能及者多矣吾知此而已設欲謂飾言  
以如吾罪吾亦何惜餘年朝  
議建之正大三年八十薨

贈答史院從事

見說才名自妙年多慙政府舊妨賢物華天寶無今古  
鳳閣鸞臺孰後先鄭圃道尊何敢望濟南書在子當傳  
莫言老眼昏花滿及見風鵬上九天

楊慥

字叔玉代州五臺人承安五年進士歷州縣入為  
尚書省令史拜監察御史侍御史京西大農司丞

京南司農卿戶部侍郎權尚書入戶曹即有相望  
事無巨細處之皆有法至於知朝廷大體則又非  
他人所能及也京城受兵權參知政事明年卒于  
河平叔王文工于詩而人不以能文稱特未見其  
耳文

過司竹監有懷王監正之

不見崧丘跨鶴仙才名留得萬人傳春郊漬酒傷今日  
夜雨論文記昔年宰樹謾縣公子劍高山已絕伯牙絃  
故居脩竹青青在寂莫終南落照邊

乾陵

牝鷄一啄血波流天下何緣不姓周今日阿婆心力盡  
乾陵禿似老僧頭

孟宗獻

字友之開封人  
大定三年鄉府省御四試皆第一  
供奉翰林曹王府文學兼記室參軍以疾尋醫久之授同知單州軍州事  
丁母憂哀毀致卒

搖搖風影漾寒塘靜裏亭臺日月長不似隋家堤岸上  
亂鴉殘照管興亡

蘇門花塢

繞舍雲山熨眼新  
看花差後洛陽塵  
從君小築繁香塢  
不負長腰玉粒春

趙 攄

字子充宛平人  
自號醉全道人

早赴北宮

蒼龍雙闕鬱層雲  
湖水鱗鱗柳色新  
絕似江行看清曉  
不知身是趨朝人

趙承元

字善長先世汴人兵火間旅寓河間遂占籍焉大  
定十三年詞賦第一人除應奉翰林學士兼曹王  
府文學以疎俊少檢得罪王府  
貶廢久之遇赦量叙卒于臨洮

探春

水底流泉匹練飛麴塵著柳不禁吹杖藜恰到春生處  
已有人家插酒旗

張 櫟

字巨濟其先秦川長春人有官於山陰者遂占籍  
焉家世貴顯巨濟明昌五年詞賦第一人仕至鎮  
戍州  
刺史

客中

絳脣花不語青眼柳初眠塵去尋芳馬香來載酒船歸  
期仍雁後野興已鷗邊惆悵無家客春風又一年

初夏

小園綠筍間朱櫻點綴年華似有情露浥葛巾晨氣潤  
風隨竹簟晚涼生閒窺黠鼠潛身處靜厭飛蚊遶鬢聲  
安得冷泉幽石畔解衣盤礴樹陰清

李 著

字彥明真定人高才博學詩文得前人體工於字畫頗尚宮言承安二年經義第一人在翰林七年出判定州召為戶部員外郎坐大中黨事謫臨洮府判官量移西京路按察司判官遷彰德府治中城再陷避于塔上兵人招降大罵不從掘塔倒而死

觀音院書閣

曲巷蓬蒿一尺深小軒岑寂似山林鳥聲落枕有高下山色閱人無古今客裏三年侵老境牀頭一易浣塵襟晚涼癡坐忘言裏滿地西風白玉簪

王中立

字湯臣岢嵐人博學強記問無不知少日治易有聲場屋間家豪于財賓客日滿門所以待之者備極豐腆其自奉則日食淡湯餅而已年四十喪妻遂不更娶亦不就舉選齋居一室枯寂如衲僧如是三四年乃出時人覺其談吐高濶詩筆字畫皆超絕若有物附之者問之不言也臨終預尅死期而逝州將石倫葬之忻州時年五十六

### 中秋

素丸東溟來飛上玻璃盆聊揮五輪手撥去萬里陰印透山河影照開天地心人世有昏曉我未嘗古今

### 雜詩 二首



華山宮殿白雲封想見當年打睡翁貪看終南山色好  
不知紅日下前峰

雲葉粼粼皴碧空笙簫遞響入天風忽驚風浪耳邊急  
不覺形神來世中

王予可

字南雲吉州人父本軍校南雲亦嘗隸籍年三十  
許大病後忽發狂久之能把筆作詩文及說世外  
恍惚事南渡後居上蔡遂平郾城之間在郾城為  
最久人與之紙落紙數百言或詩或文散漫碎雜  
無句讀無首尾多六經中語及韻學家古文奇字  
字或峭勁遇宋諱亦時避之人或問以故事應如

響諸所引書皆世所未見談說之際稍若有條貫則又以誕幻語亂之麻知幾張伯玉與之遊最狎說其所作詩以百分為率可曉者才二三耳壬辰兵亂為順天軍將領所得知其名竊議欲挈之北歸館於州之瑞雲觀南雲明日見將領自言云我不能往君家瑞雲觀也不數日病卒後復有見之者淮上

馴鶴圖

張伯玉家畫慎宮人徐行以手整釵一鶴後隨謂之馴鶴圖伯玉請賦詩欽叔常苦

其作詩多不用韻  
限以釵來苔三字

寢處粧鉛未捲釵孤雲花帶月邊來六宮簾幕金鸞冷  
露濕晨烟啄翠苔

王 戎

字子大涪州人承安中進士資剛決不可犯為尚  
書省掾知管差除與郎官相可否即棄官去往來  
登封廬氏山中改名知非字無咎自號照了居士  
居山中二十年布衣蔬食井臼自親時人哀苦之  
而知非處之自若也少日為文工于四六詩亦有  
功和二宋落花韻四首云曾見嬌窺宋玉牆忽驚  
遺夢到延涼聚塵非分侵凌玉流水無情葵送香  
錦鞵謾拋終隔面綵灰雖吐若為腸蒼苔碧草無  
窮恨木石癡兒亦自傷可人未厭出鄰牆回首空  
殘翠幕涼好事只傳懷夢草殊鄉誰致返魂香塵  
凝燕子慵開眼烟暗馬嵬空斷腸攬李絳桃俱異  
物為歌薤露寫餘傷綠影浮空只自傷賞心死著  
未能忘瓊枝不解留春色銀燭空存照夜妝肺腑  
已傳蜂蜜盡肌膏仍與燕泥香情知青帝回車日

合有翔風老退房繁華終竟合周傷獻笑紫懷忍  
遽忘露壓不禁昏淚臉風披無奈醉愁妝芳菲頓  
減園林趣狼藉空餘陌路香卻憶班姬浪辛苦一  
生都得幾專房既學佛作決定歌禪家以為證道  
新豐之後  
無有及者

禪頌 二首

放下情懷觸處安生涯耿耿沒多般褐衣襪樓聊遮赤  
短髮鬢髻底用冠一榻省緣資困歇二匙隨分了饑餐

也知苦澀人人笑烈日初心不敢謾  
貞祐末行臺都尉南征獲武經進士

李申之于盱眙左右司郎中劉光講達御潤文官李獻  
能欽叔愛其才辨欲活之以避嫌不敢也乃託以問事

機令軍中羈管之申之作詩贈主囚者云一飯感君無  
地報寸心許國只天知明朝定作長淮鬼馬革仍煩為  
裹尸又云胷中萬古橫鍾阜一死鴻毛斷不移又獻書  
都尉云金國歲歲南侵計所得不能一二州而軍力折  
耗殆盡今歲此舉亦曾慮人有議其後何以禦之乎為  
公計者不若待南軍大舉斂兵而退雖屢出無功得全  
師而返猶可自救不然師老食殫困頓于堅城之下讒  
間一行則公受禍不久矣某軍敗而死固其所也乞于  
盱眙城下責以不降之罪以一死見處使人知人知之則  
都尉亦于名教有功書上之明日申之謀遁歸不果乃  
殺之欽叔說其臨刑回面南向欣然就戮甚嗟惜之予  
謂申之胷中萬古橫鍾阜與王知非烈日初心不敢謾  
皆烈丈夫語  
故附見于此

吾身非我底為情說著塵勞特地驚五九盡時山更好

澗泉雲鳥自春聲

董文甫

字國華潞人承安中進士為人淳質恬于世味於  
心學有所得人知尊敬之而不知其所以得也子  
安仁亦學道父子嘗閒居寶豐閉戶不出以習靜  
為業朝夕不斷宴如也國華歷金昌府判官禮部  
員外郎昌武軍節度副使正大中以公事至杞縣  
自知死期作書與家人及同官又作詩貽杞縣令佐  
詩畢擲筆于地  
以翁障面而逝

審是堂

按劍人人駭夜光蜀鷄合道勝鸞鳳飛蛾可是無分別

直認油燈是太陽

文中子續經

紛紛述作史才雄聽得秋來百草蟲不是春雷轟執窟  
蚓蛇爭得化成龍元好問嘗以王氏續六經為問文甫云王氏六經以權道設教雖孔子亦然但後人不能知之耳因以此詩示之

李俊民

字用章澤州人承安中舉進士第一金亡隱居教授元世祖居潛邸以安車召之乞還山

明皇擊梧圖

不使梨園子弟知太平音在鳳皇枝一朝野鹿銜花去  
長恨秋風落葉時

辛 愿

字敬之福昌人其大父自鳳翔來居縣西南女几  
山下以力田為業敬之自號女几野人年二十五  
始知讀書取白氏諷諫集自試一日便能背誦乃  
聚書環堵中讀之書至伊訓詩至河廣頗若有所  
省欲罷不能因更致力焉音義有不通者搜訪百  
至必通而後已由是博極羣書于三傳為精至於  
內典亦稱該洽杜詩韓筆未嘗一日去其手  
作文有綱目不亂詩律深嚴而有自得之趣

亂後



兵去人歸日花開雪霽天川原荒宿草墟落動新烟困  
鼠鳴虛壁饑烏啄廢田似聞人語亂縣吏已催錢

贈劉庵主

劉遼  
貴族

密薄軒裳貴高尋綺皓蹤一囊閭里藥六尺水雲筇午  
枕眠芳景晴簷望遠峰柴門常不掩應得野夫從

贈趙宜之

夫子今詞伯胡為遠帝京青雲無轍迹白髮有柴荆鬼  
戲多年病人高四海名麟經方有缺無惜繼丘明

同趙長水汎舟

洛水秦山晚自澄，孤洲烟樹綠相仍。  
波搖朗月浮金鏡，嶺隔華星斷玉繩。  
但覺轉船驚白鳥，豈煩揮箑怒青蠅。  
風塵浩蕩飄蓬裏，愧似林宗陪李膺。

題游彥明林園

先生未老厭儒冠，築屋栽籬守歲寒。  
經史日長常滿案，魚蝦溪近得供盤。  
幽花入室無多種，瘦竹闌情只數竿。  
瀟灑遠辭車馬跡，求官何必近長安。

函關

雙峰高聳大河旁自古函關一戰場紫氣久無傳道叟  
黃塵那有棄繻郎烟迷短草秋還綠露浥寒花晚更香  
共說河山雄百二不堪屈指美興亡

隆德故宮

蛇分鹿死已無秦五十年來漢苑春問著流鶯無一語  
柳條依舊拂牆新

山園

歲暮山園懶再行  
蘭衰菊悴頗關情  
青青多少無名草  
爭向殘陽暖處生

李汾

字長源平晉人  
系出雁門曠達不羈  
好以奇節自許  
元光末用薦書得從事  
史館長源素高亢不可  
一世乃今因斗食致人  
以府史蓄之殊不自聊  
未幾忤翰長罷尋入關  
明年驅數馬來京師  
日以馬價佐歡道逢怨家  
則畫地大數而去  
又明年恒山公先在鄧之  
西山長源往說之  
署行尚書省講議官  
既而恒山與參知政事  
實勒相異同頗謀自  
安懼長源言論欲除之  
適之泌陽竟為所害

州北 三首

州北光風艷綺羅南來扈從北人多梨園法曲懷奴舞  
月窟新聲倩女歌紫禁衣冠出金馬青樓阡陌瞰銅駝  
薄游卻憶開元日常逐春風醉兩坡

琪樹明霞五鳳樓夷門自古帝王州衣冠繁會文昌府  
旌戟森羅部曲侯美酒名謳陳廣座凝笳咽鼓送華輶  
秦川王粲何為者憔悴羈塵坐白頭

樓外風烟隔紫垣樓頭客子動歸魂飄蕭蓬鬢驚秋色  
狼藉麻衣浣酒痕天塹波光搖落日太行山色照中原

誰知滄海橫流意獨倚牛車哭孝孫

上清宮

蒼梧雲氣赤城霞錦絡鈞天帝子家  
仙掌高承九霄露霓旌遙駐五雲車  
昆明火劫驚人世瀛海風濤撼客槎  
醉裏忽逢王子晉玉笙吹上碧桃花

避亂陳倉南山回望三秦追懷淮陰侯  
信漫賦長句

憑高四顧戰塵昏鷄野山川自吐吞  
渭水波濤喧隴阪

卷六十五  
散關形勢輒興元旌旗日落黃雲戍弓劍霜寒白草原  
一飯悠悠從漂母誰憐國士未酬恩

清明

鳴珂振轂滿重城春日綿綿老燕驚人在碧鷄坊外住  
澹隨流水過清明

蘇客卿秦

遊說諸侯獲上卿賈人脣舌事縱橫可憐一世癡兒女  
爭羨腰間六印榮

馬中令周

腳踏長安陌上塵布衣西上欲誰親  
君王不省常何策  
憔悴新豐一旅人

李獻甫

字欽用欽叔從弟也兄欽止欽若皆中朝名勝家  
故將種而同時四進士人門之秀照映一時欽用  
博通書傳于左氏及地理之學尤精為人精滿腹之稱  
心思所到則絕人遠甚故時人有精神滿腹之稱  
歷咸陽簿辟行臺掾屬正大初夏人請和金以折  
子駿往議欽用預行夏使有口辯馮善人無以折  
之往復之際至將歲幣為言欽用不能平從旁進  
曰夏國與敝邑和好百年今雖易君臣之名而為



兄弟之國使兄而輸幣寧有據耶曰兄弟且不論  
宋日曾與吾家二十五萬匹典故具在君獨不知  
也金朝必欲修舊好非此例不可欽用作色曰使  
者尚忍言耶宋以歲幣餌君家而賜之姓岸然以  
君父自居夏國君臣無一悟者誠謂使者當以為  
諱乃今公言之使者果能主此議以從賜姓之例  
敝邑雖歲損五十萬某請以身任之夏使語塞和議乃定

### 別春辭

東皇按轡來何遲人間二月才芳菲六十日春能幾時  
不如意事常相隨一聲啼鵲花片飛把酒卻與春別離  
春緩歸聽我歌滔滔歲月如流波貴憂孰與賤樂多吾

寧不欲列華鼎馳鳴珂香屏倚妓薦綺羅人生賦分有  
定在誰能買愁費天和長安市上酒如海跨驢徑上胭  
脂坡酒酣酣舞雙婆娑春自來去如予何

興慶池書所見

短短菰蒲刺水青翠萍開處鑑波明畫船轉過垂楊外  
水面風來聞樂聲

元德明

字明德秀容人唐禮部侍郎次山之後自幼讀書  
世俗鄙事終其身不挂口為人誠實樂易洞見肺

浪山雖童子以言欺之亦以為誠然也累舉不第放浪山水間未嘗一日不飲酒賦詩春秋四十有八終于家二子好古好問

仙鷄詩 并序

繁峙義興鎮酒家韓氏子畜一雞以善鬪雄其鄉一日敵家用藥飼雞使不知痛求與韓雞對韓雞鬪久果被傷口下頷不收垂死矣一賣藥道人過其門曰我能活此韓欣然使療之里中諸兒隨看者一二十輩皆使向壁立道人以雞置籠中探手良久若摩拊

然者已而取瓢水嚙之置瓢籠上即出門兒曹怪其  
久不還竊視之雞喙已復生矣道人布袍草冠腋下  
縣青囊落魄嗜酒夜宿寺閣上韓氏子與里中人奔  
走求之并所臥草薦不在矣是時明昌七年仲規弟  
為此鎮酒官予亦在焉作仙羅詩以記之

老雄健鬪誇擅場韓郎抱歸神色傷豈知黥兒出徼倖  
毒手一發不得防毳衣散灑尚可養利嘴一哆何由張  
青囊道人何許來自言救藥吾有方垂髫嚙水濯殘血

半喙隨手生新黃  
筠籠乍開聞膈膊  
草冠已往徒驚忙  
神仙世有寧虛荒  
惜哉詭激不可量  
世人鷲勇天且梟  
況于物也恣彊梁  
敷榮枯枿變金石  
未若與世鍼膏肓  
何須變化示狡獪  
知君辨作淮南王  
蓬萊東望雲茫茫  
愛而不見心且狂  
刀圭不願換凡骨  
且欲共醉無何鄉

送德溫同舍赴簾試

太常侍祠水蒼珮  
內相夜下金蓮燭  
皇家結網未曾疎  
亦有佳人在空谷  
一從唐賦變遼律  
仰視折楊猶雅曲

雲臺勲業一青衫被髮操戈踵相屬筋疲力涸僅乃得  
墨水一升凡幾辱英雄俛首入彀中舉世悉然非子獨  
子家口衆親又老歲月甘須寸祿薦書聞說過南宮  
冷暖人情到僮僕我初與子偕計吏人後人前隨碌碌  
不慙齊客售鼓瑟頗為荆人悲獻玉一詩今日送君行  
萬里秋風看鴻鵠

室人生朝

新酒清渾共糟牀洗盞嘗平時唯欲醉此日重難忘容

服慙王霸山林得孟光白頭翁與媪萬事聽諸郎

秋暮王氏園亭

細徑雲林底危亭澗水湄秋先殞黃葉寒未老紅葵嚼  
句幽禽答尋花晚蝶隨無人共幽興思與野僧期

寒食再遊福田寺

春山寂寂掩禪扉複嶺盤盤入翠微布鞵青鞵供勝踐  
粥魚齋鼓薦玄機日烘幽徑綠烟煖風定曉枝紅雨稀  
曾是西堂讀書客不應啼鳥也催歸

劉 祁

字京叔山西渾源人  
金之遺民著歸潛志

古意 二首

庭前有桂樹綠葉尚離披  
秋風動地起飄落將安歸  
高飛入青雲下飛入汙泥  
貴賤既偶爾孰為喜與悲

秋江有芙蓉顏色好鮮潔  
褰裳欲采折水深不可涉  
嚴風下飛霜方艷空凋歇  
悵望一長嘆臨川無桂檝

送雷伯威



朔風起天末落木鳴空山冰霜正凝沍遊子百里還山  
郭送將別徘徊上高原如何睽離情對此芳歲闌壯士  
志四方不須涕洟瀾人生非山海會面亦不難願子崇  
明德餘功振文翰長因東南鴻惠我金玉言

懷長源

涼月夜如水秋風吹紫蘭獨居悵無聊佳人阻河山河  
山邈千里相望何時已雲橫雁影沈露下蟲聲起烽火  
照中州西南殺氣浮君居劉山下果若向時不人生有

離別但惜知音絕  
匣內臥青蛇  
光芒射秋月  
汴水碧參差  
葉飛空樹枝  
如何相憶處  
還值暮秋時

征夫詞

頑雲漠漠秋天黑  
冷雨瀟瀟和雪滴  
途中騎士衣裳單  
半夜銜枚赴靈壁  
中州近歲雨雪多  
只因戍馬窺黃河  
將軍錦帳衣千襲  
馬上揮鞭傳令急  
但令飽暖度朝夕  
一死沙場吾不惜  
九重日望凱歌歸  
安知中路行逶迤  
願將舞女纏頭錦  
添作征人身上衣

征婦詞

青燈熒熒照空壁綺窗月上莎雞泣良人塞北遠從軍  
獨妾深閨長太息憶初癡小嫁君時謂君早晚擁旌麾  
如何十載尚輿隸東屯西戍長奔馳秋風戎馬臨關路  
千里持矛闕上去公家事急將令嚴兒女私情那得顧  
恨妾不為金鞵韞在君腰下隨風埃恨妾不為龍泉劍  
在君手內飛光燄慕君不得逐君行翠袖斑斕空血染  
君不見重瞳風駕遊九疑蒼梧望斷猶不歸況今沙場

征戰地千人同去幾人回  
君回不回俱未見  
妾心如石那可轉

南京遇山樓

倚天突兀聳高樓  
樓上家人白玉鉤  
落日笙歌迷汴水  
春風燈火似揚州  
仙人已去名空在  
豪客同來醉未休  
獨倚朱闌望明月  
鸞旌依約認重遊

過陳司諫墓

鸞坡烏府舊遊空  
三尺孤墳野寺中  
猶有憂時心不死

墓門昨夜起秋風

元好古

字敏之性識穎悟讀書能彊記無所不窺年二十就科舉再上不中意殊不自聊又娶婦不諧日致惡語遂以得疾未幾沒于北兵之禍年三十一

中秋無月

佳辰無物慰相思先賞空吟昨夜詩  
莫怪更深仍坐待密雲或有暫開時

讀裕之弟詩藁漫題

傳家詩學在諸郎剖腹留書死敢忘

先人臨終有剖腹留詩之語背

上錦囊三箭在直須千古說穿楊



宋元詩會卷六十五

欽定四庫全書

集部

宋元詩會卷六十六

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>田尹衡

謄錄監生<sub>臣</sub>俞 鳳



欽定四庫全書

宋元詩會卷六十六

兵部主事陳焯編

元有天下文治蔚興累朝御製詞章史臣必編次成帙而元文類弗載一字當因內府藏本不落人間也茲從野史中搜得文宗詩二首用冠簡端

元文宗

上神智天界怡情詞翰雅喜登臨居金陵潛邸時常屏從官獨造鍾山治亭吟賞竟日曾命近臣房大年畫京都萬歲山圖大年辭以未至其地上索紙運筆先作一葉授之大年驚服謂格法周匝停

勻雖積學專

工莫能及也

自集慶路入正大統途中偶吟

穿了毳衫便着鞭一鉤殘月柳梢邊  
二三點露滴如雨  
六七箇星猶在天  
犬吠竹籬人過語  
雞鳴茅店客驚眠  
須臾捧出扶桑日  
七十二峰都在前

望九華

昔年曾見九華圖  
為問江南有也無  
今日五溪橋上見  
畫師猶自欠工夫

# 楊 真

字煥然乾州奉天人母夢日光射其身而生識者謂文明之兆因以真名之金末舉進士不第作萬言策指陳時弊未及上而歸元太宗戊戌詔試諸道進士真試東平兩中賦論第一用耶律楚材薦授河南路徵收課稅所長官兼廉訪使在官十年乃請老世祖總漢南驛召叅議京兆宣撫司事累辭得請年七十終于家諡文憲所著書百餘卷

## 有懷梁仲經父

美人熒熒在何處海濶天低隔烟霧珊瑚零落芙蓉空  
咫尺相望迷去路翠輦金輿雙鳳凰風吹環珮聲玎璫

壺觴狼籍事已往一日萬里愁茫茫劉郎竟是誰家客  
歲晚霜華林葉赤美人熒熒在何處鴨綠江頭江月白  
宿草堂

廢寺人蹤斷幽溪野性便魚須分浪細虎跡印沙圓  
馴雀偷僧飯饑蚊破客眠獻芹吾豈敢直欲斲山田

寄商夢卿

無窮惟永日有盡是流年白髮誰能免丹經恐妄傳  
會心人健否到處冢纍然滾滾風波地方思萬里船

阿道村

官路人家少邊城驛使頻  
季鷹終去洛王粲近歸秦  
天地羣龍鬪泥沙尺蠖伸  
親朋應笑我頭白傷風塵

留別儒禪

溪行魚不畏巖宿虎相隨  
怕客談新事逢人誦舊詩  
衲輕聊覆體米滑欲翻匙  
僧臘知餘幾霜髭已滿頤

謝顧副言問疾

久謝公家事時勞長者車  
可憐新病後未覺故人疎  
渭

北偏饒夢河南近得書相忘吾豈敢欲出怯籃輿

訪耿君玉隱居

居幽穿洞府岸狹束溪流細逕隣翁熟縣崖遠客愁  
橋明山月上窗暗野雲浮世事何曾到年侵易白頭

雨夜

二首

關河隔千里筆硯寄餘生老覺鄉心重閒知世念輕  
浮風搖竹影細雨簌檐聲落魄緣何事吾今不用名

窗秋風獵獵檐夜雨頻頻蛩韻愁於我燈花笑向人此

身猶在洛何日定歸秦不必黃梁熟真慚白髮新

未歸

渭水遙通洛函關近隔秦百年垂老日千里未歸身夢寐嫌為客妻孥不諱貧一官無可戀花氣五陵春

荅京叔文季昆仲

何處音書至劉家好弟兄科名先世在詩律早年成嶺北饒風雪淮南困甲兵論文吾有意尊酒阻同傾

飲山家

欽定四庫全書  
宋元詩會  
卷六十六  
四  
爲愛春風好乘時把一杯百年雙眼在萬事寸心灰花向坐中落客從雲外來詩成無紙筆書地惜蒼苔

浮生懷裕之

漢節飛雲外秦城落照邊浮生空自老歸計定何年淚滿陳蕃榻心遙祖逖鞭短詩聊遣興羞向故人傳

晚至青口

長年困行役短髮易飄零世事驚春夢交親散曉星燒痕侵路黑柳色夾堤青落日明霞底原情動鵲鴒

撫州

北界連南界昌州又撫州月明魚泊夜霜冷鼠山秋為客無時了勞生有許愁殘年嬰世網吾欲謝溪鷗

青峰寺哭燦然弟

長別惟生死難忘是弟兄但吾今到處想汝昔曾行鄉社三年阻兵戈一夢驚青山風雨夜此去更傷情

至滑州堤

舊事悲存沒殘年厭往還孤城晴雪底雙塔暮雲間馬

欽定四庫全書

宋元詩會  
卷六十六  
五

沒長津在龍歸老井閒隔林青數點多是潯州山

出鴉谷宿北石橋

燒火連山暗春雲出谷遲避人投野店繫馬就疎籬舊宇頽垣在新愁客枕知清明無幾日細與數歸期

宿南石橋

江流平入楚山勢遠連秦岸柳猶含凍溪花欲破春石街車轍古沙印虎蹄新晚境長為客空山不見人

承德亨見訪

世事元無定人生只合閒君今悲白髮我亦負青山廢  
郭官居冷荒年旅食慳最憐情義厚朝至暮方還

次答正卿

二首

客愁青鏡裏歸夢白鷗邊故國人何在新秋月又圓米  
鹽逢此日詩酒負殘年長羨平林鳥雙飛入暮烟

何人依玉樹有客隱金華老覺身為累時勞夢到家且  
騎山簡馬誰識子陽蛙日暮秋風起飛塵滿画叉

次荅伯直侍郎



家貧餘四壁地勝接三鄉詞賦狂司馬形容老遂良画  
眉從爾濶舞袖為誰長生死交情在書紳示不忘

冠氏留別趙帥

主人情爛熳客子自奔忙不見猶頻夢相逢合斷腸秋  
涼拋藥裏夜雨倒壺觴回首高城北幽燕去路長

送靳才卿之平陽

却向他州去蕭蕭雪滿簪丘園初到眼兒女總關心汾  
水野烟白霍山寒霧深得歸歸更好吾亦愛秦音

呈君美

上陽門外路日暮獨歸時  
齒髮已衰謝風塵仍別離  
斷雲橫紫閣急雨掠蒼陂  
地勝饒新句君將寄阿誰

楊飛卿

吾宗久零落之子亦中年  
紫邏堪高卧玄經擬共傳  
前言非戲爾舊處依然留  
著新詩筆教隨過海船

文紀行贈之以馬

洛水西頭路桃花夾岸香  
偏宜紅叱撥小試紫游韁  
雨

徑沙初輒春山草正長杖藜猶過我此別莫相忘

懷同祖卿

東府倉皇別西河迤邐回元戎期坐嘯上客入行臺夢裏惠連句生前張翰杯龍池清似染應恨不歸來

答張君美

我無茅一把誰有橘千頭應物機仍拙憂時涕欲流謾違魚鳥信豈為稻粱謀老去輕三仕詩來抵四愁

宿重陽宮

村落到山盡軒窗臨水多野禽如舊識隣叟漸相過林  
靜連官竹籬疎補女蘿夜深眠不著倚杖看星河

應試萬寧宮

月澹長楊曉色清天題飛下寂無聲南山霧豹文章在  
北海雲鵬羽翼成玉檻玲瓏紅靄重金爐縹緲翠烟輕  
誰言半夜曾前席白日君王問賈生

稗史謂金章宗  
試貢士於萬寧

宮楊紫陽年方弱冠蓆屋稍近殿檐金主出御幄顧之  
問其名氏里貫而去故有君王問賈生之句然考其本  
傳紫陽在金末實未有  
此遇也或即元太宗乎

長安感懷

此心直欲作東周再到長安已白頭往事無憑空擊楫  
故人何處獨登樓月搖銀海秦陵夜露濕金莖漢殿秋  
落日酒醒雙淚眼幾時清渭向西流

呈公茂

冰雪相看十五年照人風采只依然我今自分蓬蒿底  
君獨何心道路邊渭北幾時無夢寐終南何處有林泉  
不妨便作求田計伴取揚雄草太玄

病中趙之讓見訪

洛陽三月不得雨君家西來常苦陰酒杯雖好怕到手  
藥裏底事猶關心對牀幾日肯相就擁被中宵愁獨吟  
莫疑衰病便揮謝解吐新句酬知音

寄商夢卿

一望東原一惘然芸窗誰與伴高眠秋風有意招張翰  
春草無由見惠連王母信音青鳥外溪翁心事白鷗邊  
殷勤為向侯芭道判却殘年老太玄

讀汝南遺事二首

軹道牽羊事已非更堪行酒著青衣  
裹頭婢子那知此爭逐君王烈焰歸

六朝江水故依然隔斷中原又百年  
長笑桓溫無遠略竟留王猛佐苻堅

出郭作

燕姬歌處嚙鶯喉燕酒春來滑似油  
自有五陵年少在平明騎馬過盧溝

過湯陰崇壽寺

城荒古寺冷於冰  
絳帳誰燒照佛燈  
閒遶空塔觀石刻  
偶聞音語得鄉僧

憶君美

銅柱從君泣  
墮鷺夷心事五湖邊  
頭顱如此人間事  
不得青山對暮年

管寧濯足圖

踏遍遼東未是癡  
藜牀欲穴只心知  
好留一掬黃泥水



漫却曹公受禪碑

讀涑水通鑑

風烟慘澹駐三巴  
漢燼將燃蜀婦髻  
欲起溫公問書法  
武侯入寇寇誰家

耶律楚材

字晉卿遼東丹王托雲八世孫父履以學行事金  
世宗特見親任終尚書右丞楚材生三歲而孤母  
楊氏教之學及長博極羣書旁通天文地理律歷  
術數之說下筆為文若宿構章宗問以疑獄數事  
所對甚優遂辟為掾後仕為開州同知宣宗遷汴  
完顏復興留守燕辟為左右司員外郎元太祖定

燕聞其名召見之日見親信嘗指楚材謂太宗曰  
此人天賜我家爾後軍國庶政當悉委之太宗即  
位首請肆赦且條便宜一十八事頒天下立燕京  
十路徵收課稅使國用充足拜中書令事無鉅細  
皆先白之權貴屢譖不行克汴城奏活百姓百四  
十七萬人文治大興年五十五薨於位追封廣寧

王諡  
文正

九日黃華屬和

西風殘日秋有客嗟幽獨偶爾得香醪  
淒然憶霜菊世態屢遷變人生多反復  
十年一夢中猶未黃粱熟

酬非熊

藹藹英聲鎮北州  
非熊人物本風流  
時逢佳客開青眼  
久領元戎尚黑頭  
已發豐城神劍出  
休嗟暗室夜光投  
驅兵經略關中了  
題遍長安舊酒樓

東趙庭玉子質

萬里龍庭白草秋  
時時歸夢舊漁舟  
酌殘白酒難成醉  
老盡黃花無限愁  
久識人心多厭政  
喜逢天下已歸劉  
而今子入中州去  
莫惜寒梅寄隴頭

元好問

字裕之號遺山太原秀容人也父德明字東巖有聲場屋累舉不第生二子長好古次好問皆以才名著而好問穎悟殊絕七歲能詩長從陵川郝天挺學六年大成下太行渡大河為箕山琴臺詩閒閒趙公見之謂少陵以來無此作也由是名震京師金興定五年舉進士金亡晦跡其詩益工學者宗之所作金史為一代鴻筆在陝時編中州集人少見者八明初始大行於世

### 滙亭

春物已清美客懷自幽獨危亭一徘徊翛然若新沐宿雲淡野川元氣浮草木微茫盡楚尾平遠疑杜曲生平遠遊賦吟諷心自足竭來著世網抑抑就邊幅人生要

適情無榮復何辱乾坤入望眼容我謝羈束一笑白鷗  
前春波動新綠

龍潭

層冰積浩蕩陵谷互吞吐窈窕轉幽壑突兀開淨宇回  
頭山水縣亦復墮塵土孤雲鐵梁北宇宙一仰俯風景  
初不殊川塗忽脩阻寒潭海眼淨黯黑自終古蟄龍何  
年卧萬國待霖雨誰能裂蒼崖雷風視掀舉

黃公廟

羈客無恒居六月走長路清風黃公祠地古欣所遇劍  
飛素靈哭龍躍雲雨赴堂堂文成君談笑取帝傳功名  
要有命陰相知何預誰謂圯上人異事驚竹素河清不  
可俟筋力疲世故袖間一編書塵埃歎遲暮

別李周卿

行路澀于棘單車望千山歌君歸雲曲清涕留餘潛六  
年河朔州動輒得謗訕惟君篤高義日來款柴關古交  
松栢心今交桃李顏古人去不返古道挽不還相思一

樽酒幽恨寄山間

九日讀書山中 二首

行帳適南下居人跼庭戶城中望青山一水不易渡今  
朝川涂靜偶得展衰步蕩如脫囚拘廣漠開四顧半生  
無根著筋力疲世故大似丁令威歸來歎墟墓鄉閭喪  
亂久觸目異平素枌榆雖尚有歲晏多霜露

今日復何日霜氣倏已淒登高有佳招山中古招提翩  
翩劉公子玉田重相攜乾坤動詩興澗壑忘攀躋霍侯

家甚貧劣有酒與雞城居厭輦鼓移家此幽棲世網不  
易逃所向皆塵泥何以濯我纓林間有清溪

少林

雲林入清深禪房坐蕭爽澄泉潔餘習高鳥喚長往我  
無立豹姿漫有紫霞想回首山中雲靈芝日應長

緱山置酒

靈宮肅清曉細栢含古春人言王子喬鶴馭此上賓白  
雲山蒼蒼平田木欣欣登高覽元化浩蕩融心神西望



洛陽城大路通平津行人細如蟻擾擾爭紅塵蓬萊風  
濤深鬢毛日夜新殷勤一杯酒愧爾雲間人

種松

百錢買松羔植之我東墻汲井浣塵土插籬護牛羊一  
日三摩挲愛此添丁郎昨宵入我夢忽爾變昂藏昂藏  
上雲雨慘澹含風霜起來月中看細鬣錯針芒惘然一  
太息何年起明堂鄰叟向我言種木本易長不見河畔  
柳顧盼百尺強君自作遠計今日何所望

飲酒 三首

西郊一畝宅閉門秋草深牀頭有新釀意愜成孤斟舉  
杯謝明月蓬華肯相臨願將萬古色照我萬古心

去古日已遠百偽無一真獨餘醉鄉地中有羲皇醇聖  
教難為功乃見酒力神誰能釀滄海盡醉區中民

此飲又復醉此醉更酣適徘徊雲間月相對澹以默三  
更風露下巾袖警微濕浩歌天壤間今夕知何夕

雜詩 三首

相士如相馬滅沒深天機區區銅馬法徒識牝與驪人  
言當塗公惡人知其微如何許劭語受之不復疑知人  
固不易人亦未易知妍媸在水鏡鉛粉徒自欺

崑山有璞玉外質而內美唯其不自銜故與頑石齒和  
也速於售再獻甘滅趾在玉庸何傷惜君兩足耳

堂堂明堂柱根節幾歲寒使與蒲柳同扶厦良亦難我  
衣敝緼袍我飯苜蓿盤天公方試我劍缺勿妄彈

放言

韓非死孤憤虞卿著窮愁長沙一湘纍郊島兩詩囚  
生定能幾肺肝日相讐井蛙奚足論禪風良足羞正有  
一朝樂不償百年憂古來帝王師或從赤松遊大笑人  
間世起滅真浮漚曾是萬戶封不博一掉頭有來且當  
避未至吾何求

學東坡移居

五首

廢地三畝餘十年長蒿萊瓦礫雖糞壤白骨深蒼苔孤  
客無所投即此營茅齋墾斷豈不苦寢處亦可懷辱身

賤者事寧當惜筋骸伐木荒林中運甓古城隈辛勤八十日吾事乃得諧買宅必萬錢一錢不天來今晨見此屋一笑心顏開

壬辰困重圍金粟論升勺明年出青城瞑目就束縛毫釐脫鬼手攘臂留空橐聊城千里外狼狽何所託諸公頗相念餘粒分鳬鶴得損不相償坏土填巨壑一冬不製衣繒纊如紙薄一日僅兩食強半雜藜藿不羞蓬蒿行粗識瓢飲樂敵貧如敵寇自信頗亦慙兒啼飯蘿空

堅陣為屢却滄溟浮一葉渺不見止泊五窮果何神為  
戲乃爾虐

舊隱嵩山陽筍蕨豐餽餉新齋浙江曲山水窮放浪乾  
坤兩茅含氣壓華屋上一從陵谷變歸顧無復望樵漁  
憶還往風土夢閒曠恍如悟前身姓改心不忘去年住  
佛屋盡室寄尋丈今年僦民居卧榻礙盆盎靜言尋禍  
本正坐一出妄青山不能隱俛首入羈鞅巢傾卵隨覆  
身在顏亦強空悲龍髯絕永負魚腹葬置雖良有餘終

身志懲創

國史經喪亂天幸有所歸但恨後十年時事無人知興  
廢屬之天事豈盡乖違傳聞入讐敵祇以興罵譏老臣  
與存亡高賢死兵饑身死名亦滅義士為傷悲哀哀淮  
西城萬夫甘伏尸田橫巨擘耳猶為談者資我作南冠  
錄一語不敢私裨官雜家流國風賤婦詩成書有作者  
起本良在茲濕薪烟滿眼破硯水生髭造物留此筆吾  
貧復何辭

此州多寓士論年悉肩隨風波同一舟奚必骨肉為倪  
家蓮花白每釀必見貽季昌妙琴事足以相娛嬉郭侯  
家多書篇帙得徧窺趙子篤於學間以問所疑王生舊  
鄰舍窮達心不移千里訪存歿十口分寒饑獨有仲通  
甫天馬不可羈直以論詩文稍稍窺藩籬永懷王與李  
朔漠行當歸我作野史亭日與諸君期相從一笑樂來  
事無庸知書來聞吉語報我脫絳維慚非一狐腋不值  
五穀皮



野史亭夜雨感興

私錄闕赴告求野或有取秋兔一寸毫盡力不易舉衰  
遲私自惜憂思當誰語展轉天未明幽窗響疎雨

過晉陽故城書事

惠遠祠前晉溪水翠葉銀花清見底水上西山如卧屏  
鬱鬱蒼蒼三百里中原北門形勢雄想見城闕雲烟中  
望川亭上閱今古但有麥浪搖春風君不見繫舟山頭  
龍角禿白塔一摧城覆沒薛王出降民不降屋瓦亂飛

如箭鏃汾流決入大夏門府治移著唐明村只從巨屏  
失光彩河洛幾度風烟昏東闕蒼龍西玉虎金雀觚稜  
上雲雨不論民居與官府僊佛所廬餘百所鬼役天才  
千萬古爭教一炬成焦土至今父老哭向天死恨河南  
往來苦南人鬼巫好機祥萬夫畚鍤開連岡官衙十字  
改丁字釘破并州渠亦亡幾時却到承平了重看官家  
築晉陽

九月七日夢中作詩續以末後一句

桃花紅深李花白昨日成團今日折歌聲滿耳何處來  
楊柳青旗洛陽陌拊君背握君手朝鐘暮鼓無了期世  
事于人竟何有青青鏡中髮忽忽成白首六國印何如  
負郭一頃田千載名不及即時一杯酒

過劉子中新居

鄆州城隅兩茅屋市聲喧喧自幽獨春風吹盡山杏花  
只有青青一叢竹先生愛畫如惜玉練鵲翔鸞餘百軸  
大兒踉蹌挾書歸土銚疎烟繞一粥微官枉負半生閒

也著區區簿領間何時却與溪南老紫蓋山前共往還  
高門闕

高門闕頭霜樹老細路千山萬山繞亂餘村落不見人  
霰雪霏霏暗清曉莘川百里如掌平閒田滿眼人得耕  
山中樹藝亦不惡誰遣多田知姓名許李申楊竟何得  
只今惟有石灘聲

歸舟怨

渡頭楊柳青復青閨中少婦動離情只從問得狂夫處

夜夜夢到洛陽城城南吹櫓聲北雁鳴嚶嚶江流望不  
極相思春草生

天門引

秦王深居不得近從破衡成欲誰信白頭遊客困咸陽  
憔悴黃金百斤盡海中僊人黃鵠舉大笑人間爭腐鼠  
丈夫何意作蘇秦六印才堪警兒女古來多為虛名老  
不見阿房淨如掃千年虎豹守天門一日牛羊卧秋草

蛟龍引

古劍咸陽墓中得挾開青雲見白日蛟龍地底氣如虹  
土花千年不敢蝕洪鑪烈焰初騰精橫海已覺無長鯨  
世上元無倚天手匣中誰解不平鳴割城恨不逢相如  
佐酒恨不逢朱虛尚方未入朱雲請盟槃合與毛生俱  
誰念田文坐中客只將彈鋏歎無魚

荊棘中杏花

牆東荒蹊抱村斜荊棘狼藉盤根芽何年丹杏此留種  
小紅濺濺爭春華野人慣見漫不省獨有詩客來咨嗟

天真不到鉛粉筆富艷自是宮闈花曲池芳逕非宿昔  
蒼苔濁酒同天涯京師惜花如惜玉曉擔賣徹東西家  
杏花看紅不看白十日忙殺遊春車誰家園亭有此樹  
鄭重已著重幃遮阿嬌新寵貯金屋明妃遠嫁愁悲笳  
落花紫簾拂牀席亦有飄泊沾泥沙天公無心物自物  
得意未用相陵誇黃昏人歸花不語唯有落月啼栖鴉

湘夫人咏

木蘭芙蓉滿芳洲白雲飛來北渚遊千秋萬歲帝鄉遠

雲來雲去空悠悠  
秋風秋月沅江渡  
波上寒烟引輕素  
九疑山高猿夜啼  
竹枝無聲墮殘露

後平湖曲

越女顏如花  
吳兒潔如玉  
天教並牆居  
不著同被宿  
美人一笑千金  
黃金連城不博  
百年心  
樓上牆頭無一物  
暮  
纈朝春  
一生足  
秋風拂羅裳  
秋水照紅妝  
舉頭見郎至  
低頭采蓮房  
郎心只如菱刺短  
妾意未覺藕絲長  
與郎  
期何許  
眼礙同舟女  
春波澹澹無盡情  
雙星盈盈不得



語十里平湖艇子遲  
岸花汀草伴人歸  
鴛鴦驚起東西去  
唯有蜻蜓接翅飛

隋故宮行

渭川楊柳先得春  
二月鶯啼百轉新  
長春宮中千樹錦  
暖日晴雲思煞人  
君王半醉唱吳歌  
絳僊起舞頻翠娥  
吳兒謾說曾行樂  
三十六宮能幾多  
千秋萬古金銀闕  
海沒三山一毫髮  
繁華夢覺人不知  
留得寒蛩泣秋月  
寄答溪南詩老辛愿敬之

五年不喚溪南渡，日夕心馳洛西路。山中今日見君詩，惆悵良辰又相誤。龍蛇大澤變風景，虎豹天門鬱烟霧。丈夫不合把鉏犁，青鬢無情忽衰素。平泉漫作窮愁志，笠澤休題自憐賦。長安正有五侯鯖，骯髒誰能作樓護。青燈老屋深蓬蒿，蝙蝠掠面莎雞號。劍歌夜半激悲壯，松風萬壑翻雲濤。區區墓上曹征西，我知慚愧王東皐。人生只有一杯酒，螟蛉蜾蠃安能豪。

密公寶章小集

天東長白太寶幢天河發源導三江有木蔽映山朝陽  
云誰巢者雛鳳凰雲間吐氣日五色百鳥不敢言文章  
名都盤盤魏大梁黃金甲第羅康莊王家書絕畫亦絕  
欲與中秘論低昂密公書院無絲簧窗明几潔凝幽香  
元光以後門鑰費文士稍得連壺觴客來喜色浮清揚  
典衣置酒餘空箱生平俊氣不易降眼中俗物都茫茫  
淵明素琴嵇阮酒妙意所寄誰能量在昔武元握乾綱  
扶桑為弓射八荒獵取大國如驅羊民風朴魯資質彊

文治未及武克剛興陵之孫越王子天以人瑞歸明昌  
十三執經侍帝傍十八健筆凌阿房撐腸文字五千卷  
靈臺架構能鋪張高陽苗裔襲衆芳胡不置之貢玉堂  
袖中正有活國手地下纔得修文郎悲風蕭蕭吹白楊  
丘山零落可憐傷承平故態耿猶在拂拭寶墨生輝光  
恰似如庵連榻坐一甌春露淡相忘

密公子瑜完顏  
宗室中第一流

人也平生所寶惟書畫家藏幾與中秘等南渡倉卒公  
抱持愛護與身存亡於他物一無所攜故竟坐窮以薨

君子  
傷之

覓神霄道士古銅爵

雷章著土紛朱碧秋茵春蒲人不識若非儀狄墓中來  
應自杜康祠下得古人偶得酒之傳摸索飲器流饒涎  
巧偷豪奪吾何敢他日酬君九府錢

贈休糧張鍊師

金砂霧散風雨疾一點黃金鑄秋橘中林宴坐人不知  
野鹿銜花蜂課蜜富兒盤饌羅羶葷擾擾飛蠅復聚蚊  
見說西山好薇蕨一枝青竹願隨君

題商孟卿家明皇合曲圖

海棠一株春一國燕燕鶯鶯作寒食千古萬古開元日  
三郎搦管仰面吹天公大笑嗔不得寧王天人玉不如  
番綽樂句不可無宮腰不按羽衣譜疾舞底用牧豬奴  
風聲水聲闕清都夢中令人羨華胥何時却並宮牆聽  
不恨將身作李暮

蟾池

老蟄食月飽復吐天公一目頻年瞽下界新增養蟾戶

玉斧誰憐修月苦郡國蟾池知幾所碧玉清流水仙府  
小蟾徐行腹如鼓大蟾張頤怒于虎渠家眉間有黃乳  
膏梁大丁正須汝何人說與月復讎疾過池頭不容語  
向來屬私今屬官從今見墓當好看爬沙即上青雲端

劉逵筆

老斂力能舉玉杵文陣挽彊猶百鈞惜哉變化太狡獪  
嚮也褐衣今虎文宣城諸葛寂無聞前後兩劉新冊勲  
謝郎神鋒恨太雋雖然豈不超人羣三錢雞毛吐皇墳

尖奴定能張吾軍何時酌我百壺酒為汝醉草垂天雲  
祖唐臣愚庵

小智怯盜所羞大智移國鬼與讎浮生匹絹兩孟粥  
心計擾擾知何求青州荊州兔三窟古人今人貉一丘  
喚起羅池柳夫子與君同醉訾家洲

常山妖生四十月能搦管作字筆意開廓有成人  
之量喜為賦詩使洛誦之

大兒小兒舞商羊東家西家捉迷藏牙牙作羣雁雁行



是中乃有常山郎常山嬌嬌可憐蟲四歲未有三歲彊  
黑鷹破殼自神駿黃犢放脚須跳梁只知見紙即塗抹  
誰謂轉腕能低昂渠家兩公破天荒劉煇夢靈果專場  
榮鄉亭中詩版在岐山名字香山香此郎晚出西樞房  
虎穴虎子不可當天驚地怪見落筆便合抱送中書堂  
文星煌煌照燕南青青子衿滿恒陽教官連被鳳尾諾  
瑞物多生金粟岡兒曹變化不作難何必二十始乖張  
明年作字一丈大當有稜角垂光芒

金世宗御書田不伐望月婆羅門引分得楚字韻  
瑤光樓前按歌舞桂樹秋香月三五白頭誰解記開元  
四海歡聲沸簫鼓兩都秋色皆喬木三月阿房已焦土  
天上亦有別離情可是田郎心獨苦承平舊物霓裳譜  
寶氣暉暉映千古銀橋望極竟不歸滅沒燕鴻下平楚

贈別孫德謙

津橋垂楊雪花白挽斷春衫苦留客西湖一雨春意濃  
絕似銅駝洛陽陌湖亭轟醉卧春風到手金杯不放空

鵲山一帶傷心碧  
羨殺孫郎馬首東

紀子正杏園燕子

紀翁種杏城西垠  
千株萬株紅艷新  
今年寒食好天色  
曉氣鬱鬱含芳津  
天公自愛此花好  
朝熏暮染煩花神  
融霞暈雪一傾倒  
非烟非霧非卿雲  
未開何所似乳兒  
粉妝深絳唇能啼  
能笑癡復駛畫出  
百子元非真半開  
何所似里中處女  
東家隣陽和入骨  
春思動欲語不語  
時輕顰就中爛縵  
尤更好五家合隊  
號與秦曲江江頭

看車馬十里羅綺爭紅塵陽平一邑多詩豪主人買酒  
邀衆賓花時有成約恨少楊子張吾軍落花著衣紅續  
紛四坐慘澹傷精魂花開花落十日耳對花不飲花應  
嗔愛花常苦得花晚爭教行樂無閒身芳苞一破不更  
合且看錦樹烘殘春

汎舟大明湖

長白山前繡江水展放荷花三十里看山水底山更佳  
一堆蒼烟收不起山從陽丘西來青一灣天公擲下半

玉環大明湖上一盃酒昨日繡江眉睫間晚涼一櫂東  
城渡水暗荷深若無路江妃不惜水芝香狼藉秋風與  
秋露蘭襟鬱鬱散芳澤羅襪盈盈見微步晚晴一賦畫  
不成枉著風標誇白鷺我時驂鸞追散仙但見金支翠  
蕤相後先眼花耳熱不稱意高唱吳歌叩兩舷喚取樊  
川搖醉筆風流聊與付他年

賦邢州鵲山

去時唐山道望望鵲山背今朝西北看奇秀益可愛蒼

茫失層疊解駁見縈帶浮雲自來去盡巧寧變壞吳妝  
入小筆隱隱拂殘黛城隅靜女人不知擁髮低顰如有  
待太行橫截九州半一掩一重俱有態只知天平六峰  
天下稀此山東來亦間在烟埋雨沒今幾時殆天所藏  
予發之郭熙未足語平遠摹寫惟有章郎詩

癸卯歲杏花

南州景氣暖杏花見紅梅讀書山前二月尾向陽杏花  
全未開待開竟不開怕寒貪睡嗔人催愛花被花惱不

徹一日遶樹空千回牙牙嬌語山櫻破稠開成團稀作  
顆小蕾從教絳蠟封繁枝未要晴雲裏兩月不舉酒半  
歲不作詩更教古銅瓶子無一枝綠陰青子長相思今  
年閏年好寒節花開不妨遲一月

宋元詩會卷六十六